

尚仰體朕心益修戎備無怠惕以廢事無姑息以長奸  
無營私以撓公無苛刻以擾衆務使部伍充實士馬精  
強訓練不為虛文征調皆有實用庶幾重根本之勢消  
彙孽之萌以稱朕張皇六師至意如贊朕命責有所歸  
爾等其欽承之

○隆慶四年正月乙亥

上諭兵部曰畿輔重邊地方武備廢弛已久近來言者皆  
詳於外而略於內豈萬全計爾等宜悉心詳議所以捍  
外禦內者具奏施行既而尚書霍冀等條為十事以上  
一更置守令謂近邊府州縣掌印官民兵錢糧城堡器  
械悉屬綜理所係甚重宜行總督撫按官公同甄別甚

應久任其應改調遇有員缺吏部仍慎選甲科老練之  
人充之如科貢吏員出身有異才堪任者一體起用一  
修繕城堡謂保障邊方城堡為急往年猾虜止于攻毀  
堡寨近則攻陷州縣城矣今沿邊方地方自永順二府  
之外州縣城垣與軍民屯堡全未經略即如近京蘆溝  
橋河西務皆素稱大鎮虜必垂涎之地宜速行各該守  
臣增築牆垣多開濠塹工費取之撫按贓罰及戶部開  
納事例銀一申明保甲謂郊畿近地軍民襍處往往盜  
起肘腋而不知虜至門庭而莫避宜申明保甲之法有  
急共救有罪同罰其他點閘科派之擾一切禁之一團  
練民兵謂各州縣設有民壯專備緩急之用而有司獨



用以供迎送之役全不教練故民兵雖設武備日弛宜如近議嚴行所在撫臣加意教閱其有額外壯丁堪練者多方募集編成什伍擇其有信義服人者立為隊長隊副以統領之平時則量減徭役防秋則量給行糧如有捍虜功一體陞賞一修築墩臺謂墩臺為烽火耳目之寄而近邊州縣多圯廢不修猝遇虜倣不便 傳報宜酌量冲緩以時修築多撥軍夫守之一製造火器謂中國之長技全在火器如連珠砲神鎗快鎗等項宜一一多備仍選軍民精銳有膽力者充為火器手不時教習以濟緩急一栽植樹株謂畿輔重地平衍空濶虜騎得以長驅宜于各城堡外多種樹木不惟利民且因

可以捍虜一預計防守謂城堡既修又須法令素明乃能有濟宜令各府州縣掌印官查照各城堡梁口數目編定號次以為信地挨戶出丁守之雖勢豪之家不得循情優免倘遇虜報戒嚴即挑選壯丁如期策應一嚴謹收斂謂虜若大舉則當下清野之令使各處保甲馬上執旗召集鄉民悉遷入城堡如有怠玩者罪之一責成兵備謂畿輔地方一應兵馬錢糧之事全賴兵備分理必功罪相同而後能戮力共濟即如近年宣大地方戰守之功無歸之兵備而頃者大同失事罪止坐總督鎮巡甚非法紀今後宜以為戒使人人知責任所在不容他諉庶邊務有裨疏入



上以為然令各該撫按督率兵備等官着實舉行更置有  
司務依期作速具奏

飭邊防

○隆慶元年六月甲辰吏部尚書楊博言頃者天變異常  
凡霖雨地震水雹悉為陰沴之象

皇上宜修實政以答天心今邊務最急宜及秋防伊邇申  
飭邊臣嚴為之備

上批答曰各邊兵食戰守機宜今劉燾王之誥霍冀各督  
撫鎮兵備守巡等官竭忠為國協力整理秋防事竣仍  
核功罪以聞

○七月丁卯

上諭吏兵二部曰薊鎮邊牆因久雨傾圮雖已降旨修築  
未知工緒如何又未知修築之外別有禦虜長策否其  
亟推才望大臣一人行邊會同督撫等官閱視工程及  
講求便宜以聞於是尚書楊博等言兵部侍郎遲鳳翔  
可

上從之命鳳翔兼都察院右僉都御史賜勅以行勅曰朕  
惟安邊固圉為備當周為謀當預通聞薊鎮邊牆因夏  
月霖雨倒塌數多該鎮正在興工修理而復值秋霖旋  
築旋圮今不知工程果已若何文武吏士久事版鍤勞  
瘁之狀恒軫朕心又今入秋漸深萬一工未即成其禦  
虜之策安出計諸邊臣義存報國志切立功當必有成



畫矣茲特命爾前去該鎮宣布朕憫念之意徧歷緊要處所驗督工程勞撫士卒俾勿墮沮倦怠必期早完仍會同總督劉燾總兵官李世忠劉漢巡撫耿隨卿及各將領兵備等官悉心計議目今若何從宜戰守日後若何經久備禦凡有長策逐一具奏中間或有顧忌不敢自言之情拘碍不能自為之事亦就從實條列奏請邊情重務朝廷謂爾有才識特遣爾往處分爾宜仰體朕心務得周詳的確來奏庶副簡命爾其欽哉

○十月乙酉

上日講畢問大學士徐階等以石州陷故諭令選將調兵加意防守于是戶科都給事中魏時亮上言此者

陛下因閱御史奏而憂及虜寇又於日講之後問輔臣以石州事此二事仰見我

皇上之加意勤政乃安攘之大本也願益推此心遠法帝堯之無怠無荒近法

孝皇之召問大臣俾司馬強兵司徒足食宗伯教民以禮令親上死長而冢宰揀拔真才以任羣治如古六卿之職而

陛下獨以神運之則順治威嚴而虜患不足平矣工科左給事中吳時來亦言

聖情留意邊防如此虜已在目中更望歷召吏戶兵部問以督撫得人若何防守定計若何錢糧接濟若何庶令



當事者人人惕厲永保無虞  
上皆嘉納之

○十一月辛酉

上諭輔臣徐階等曰朕聞東西二鎮虜寇荼毒至甚防虜  
之計圖之宜豫卿等其會文武羣臣務實詳議以聞于  
是階等上議曰此者

皇上以東西二鎮突被虜患特降

聖諭命臣等務實講求預處之策此誠

聖慮宸猷所以制治保邦衍隆平之慶于無疆者也臣等  
愚陋不足奉明詔其事在閫外難遙度者請仍俟邊臣  
計奏而邊臣得便宜從事者亦無容瑣瀆以煩

聖聽臣等謹以邊臣所不得自言之情與所不能自專之  
事提綱挈要彙括諸臣所條議而參以一得之愚具列  
十三事如左伏惟

聖明裁擇一責實效二定責任三明戰守四申軍令五重  
將帥六練軍兵七繕城堡八團民兵九處久任十廣招  
納十一儲人才十二理鹽法十三擇邊吏

上是之命二鎮諸邊總督鎮巡等官即以所議務實舉行  
其有仍前欺怠者兵部科道及巡按御史參奏重治

○隆慶二年二月己酉

上在天壽山諭輔臣曰朕躬謁我

祖考陵寢始知邊鎮去京切近如此茲薊州總督官來朝



言近者虜情如何今邊事久壞無為朕實心整理者但  
遲辭說弄虛文將來豈不悞事卿等及部臣議擬以聞  
于是兵部言京師

陵寢均為腹心重地去虜營密邇薊鎮藩屏于東宣鎮股  
肱于西為左右輔使二鎮守臣實心幹濟固可恃以無  
恐而邇來人心玩愒或文武互為參商或官屬自相矛  
盾或怵于法網之太密或牽于議論之太多坐是日弛  
一日誠如

聖諭屬者雖據總督諸臣報稱無倣而衣衾之防正在今  
日即當移檄二鎮守臣多方偵伺務令預得虜情早為  
經略用紓

皇上宵旰之懷其徒為文具偵事殃民仍蹈故習者罪無  
赦

上是之令總督鎮巡等官各條上見行戰守方畧以聞

○六月癸巳總督薊遼侍郎譚綸條上分立三營事宜請  
於薊昌十路練兵三萬人列為三大營以遵化永平遊  
兵二枝合巡撫標兵一枝為遵化一營巡撫都御史劉  
應節提督之以建昌遊兵一枝合鎮守標兵二枝為三  
屯一營鎮守總兵官郭琥提督之以振武石匣二營合  
總督標兵二枝為密雲一營練兵都督戚繼光提督之  
各以兵備監督其遵化三屯二營仍聽繼光往來總理  
而悉受制于總督不得矛盾同異當春秋兩防之時各



屯要地如永平一區有警則遵化一營禦之三屯出二哨應之密雲出一哨應之薊州一區有警則三屯一營禦之遵化出二哨應之密雲出一哨應之密雲一區有警則密雲一營禦之三屯出二哨應之遵化出一哨應之兵皆據牆為戰以拒虜不入為上功其或一面失守致虜潰入則合三營之兵併力奮擊務收全捷又言薊鎮補練主兵將以罷調客兵今行之已踰十年主兵竟不能充客兵終不可罷何者任之未專而行之未實也今宜責之臣綸與繼光使得專任其事勿使巡按巡閱御史攙與其間俟三年補練有成然後遣官閱視補得主兵二枝即罷調客兵一枝補得主兵一萬即罷調客兵五千專任既專功效自著比之頻年補練迄無成績不可同日而語矣疏入報可已而巡撫都御史劉應節言薊昌十路惟永平一區最為單弱宜厚集兵力以圖固守不當以其去京稍遠而秦越視之以臣愚計宜于振武營改設副總兵一員駐劄密雲統領總督標下各營兵馬建昌營改設副總兵一員就彼住劄統領鎮巡標下各營兵馬以聽總理者往來督率訓練庶聲勢相聯而于體統亦無所紊

上曰練兵乃禦虜要務督撫官宜協力幹理以副朝廷委任是所言分營訓練與譚綸原議不同未見有同心為國之義秋防期近其令會議詳確并議處舊額兵馬以



聞

○七月己酉

上諭輔臣曰秋防屆期不知各邊已有備否去歲失事邊臣朕從寬宥令內外官尚多虛言誤事者卿等宜示兵部申飭譚綸等今後務期實心共濟不得仍蹈前非縱虜深入違者朕處以法不貸

○九月甲戌

上以秋防將竣恐各邊督撫鎮巡等官忘備玩寇命兵部移文申飭之

○隆慶三年六月乙未兵部尚書霍冀奏禦戎之道守備為先去年各邊防秋無警通者又聞掩谷西搶回夷其

在中國似可晏然無虞矣乃臣猶有慮者臣伏觀九邊事勢遼鎮雖常逐虜而河西之寇頻聞薊鎮固稱設險而補練之兵未足昌平則禁山之後可慮保定則三關之口宜防宣府近有車夷之搶不能無嚮導之憂大同久失大邊之險難保無剝膚之害山西士多脆弱延綏久苦征調寧夏三面受敵無一可拒之塞固原一望沙漠尤多易犯之區至于甘肅僻在西陲素稱無備即今各酋或住營莊涼山後或聚收西海水頭搶番夷者得志則乘勝而謀我不得志則乘機而噬我我之為謀少疎則安枕未有日也惟

聖明篤戒邊臣勿令弛備





上曰然各邊近雖少警未可恃以為安其亟行諸鎮總督  
鎮巡等官嚴加隄備比年所議戰守事宜務實修舉毋  
事虛文

○隆慶四年正月甲申兵科都給事中張鹵疏論總督陳  
其學巡撫王遴不職狀因言宣大總督原駐陽和居兩  
鎮適中之地便于經略已而移駐懷來專備南山夫虜  
不能越上谷以伺南山則南山不宜株守明矣請如故  
事令總督駐陽和仍嚴核薊鎮練兵實效及入衛兵減  
撤之數而戒諸將官各戮力任事無飾虛言兵部覆議  
得旨令其學回籍聽用遴策勵供職今後總督每遇春  
秋兩防照舊駐劄陽和有警相機調度餘俱如疑

○三月壬午兵部覆都給事中溫純言頃聞宣大屢有虜  
報而今督撫將領諸臣在陳其學則當回籍在方逢時  
則當新任在王遴則當內轉在馬芳趙苛則始更置繼  
總督者王崇古尚候代于陝右繼巡撫者孟重始聞命  
於洛中尚書郭乾方自留都行取未至事勢可虞請各  
加申飭

上曰邊報屢至防守宜嚴其亟行各該督撫等官用心防  
禦新陞者趣令赴任毋致稽延誤事

○隆慶五年八月乙卯勅諭諸邊鎮督撫等官王崇古等  
曰朕受

天明命君主萬方內夏外夷無不欲其得所昨歲北虜款



關求貢議者紛紛可否互異朕方欲廣并包之仁故不責既往納其貢獻授官職許為外臣然夷狄之性叛服不常制禦之方自治為要近該輔臣建議請降勅諭申飭各鎮文武諸臣及時整理邊務誠為安攘至計茲特諭爾等除職掌所係照常修舉外乘今邊患稍寧嚴督將領諸臣將一應戰守事宜着實整理樽節費用務有贏餘修築險隘務堪保障訓練兵馬務皆精壯修整器械務皆犀利召種屯田務廣儲積清理鹽法務使疏通收買胡馬務求實用招徠逆黨務令解散其事有不便應令改弦易轍者亦要明白具奏請旨定奪毋得拘泥陳說因循自誤以後每年聽行邊大臣查覈紀驗果能事

事整飭著有實績比照擒斬事例重加陞賞如踵襲故套推諉誤事即照失機從重擬罪爾為總督重臣通貢二事既已屢效忠謀尤須慎終如始廣集眾思悉心區畫毋以目前無事而遂忘戒備之心毋以一時權宜而遂為經久之計務俾邊政修舉日勝一日禦虜之算萬全無遺斯副朕委托之重高爵懋賞朕不爾吝或如怠玩廢弛以致債事責有所歸爾其慎之慎之

懷遠人

○隆慶元年十一月丙寅朝鮮國權國事李松遣陪臣沈銓入謝表貢馬匹方物因歸我被倭掠去人民陳滿等二十餘人



上曰李昫署國之初即效忠順其賜勅諭以旌之仍賜白金百兩錦綺四疋紵幣十二表裡其獲功人等賞金帛有差

○隆慶二年八月辛卯兵部議覆宣大山西督撫陳其學等奏請優錄降人白春魏良相田汝光田淮王現等并議招降賞格凡被虜人能斬獻大酋首如掩答者能率男婦五百名口三百名口來歸者悉如會題例陞賞外其五百名口者仍賞銀一百兩三百名口者仍賞銀七十兩若有率二百名口以上者授以正千戶仍賞銀五十兩一百五十名口以上者授以副千戶仍賞銀四十兩一百名口以上者授以實授百戶仍賞銀三十兩五六十名以上者授以所鎮撫仍賞銀二十兩二三十名以上者授以冠帶總旗仍賞銀十兩俱世襲十名以上者分別賞賚俱以過邊實數為則若能斬獲逆叛如趙全周元首級來獻者即授以都指揮僉事實賞銀一千兩成能殺害不及斬首自身投降來報者巡按御史覈實如前例陞賞其已歸降又能招誘降者亦如陞賞逆首自能悔罪來降通宥其罪仍授以指揮僉事實賞銀五百兩再能率眾二三百名以上者授以指揮同知賞銀一千兩仍陞見任將官管軍管事各該承委招降墩哨人役果能率眾一起五十名口以上者授以所鎮撫二百名口以上者授以實授百戶俱世襲軍役伴送降人至



者每名賞銀五錢降人不問男婦老幼督撫行各原籍  
動支官銀分別查給為寧家之資仍復其身

上命如議行其歸正人果有智勇諳虜情者令督撫官一  
體任用宣布朝廷恩信以廣招徠

○隆慶三年十二月辛酉琉球國中山王尚元遣其臣守  
備由必都等歸我被虜人口守臣以聞

上嘉尚元屢效忠誠賞銀五十兩綵段四表裡仍賜勅獎  
勵由必都等各給銀幣有差

○隆慶四年十月癸卯虜酋俺答孫把漢那吉率其屬阿  
力哥等十人來降總督王崇古受令散處鎮城會俺答  
攻略西番聞變亟引還約諸部兵入犯崇古檄各鎮巡  
嚴兵禦之乃上言今

聖武布昭黠虜效順殆天意非人力也顧其事係國體不  
細臣熟計之有三策焉把漢脫身來歸非擁衆內附之  
比宜給宅授官厚賜衣食以悅其心禁絕交通以防其  
詐多方試之以察其志歲月既久果無異心徐為錄用  
使俺答勒兵臨境則當諭以恩信許其生還因與為市  
今生縛板升諸逆趙全等致之麾下仍歸我被虜士女  
然後優賞把漢而善遣之此一策也如其恃頑強索不  
可理論則嚴兵固守隨機拒戰且示以必殺制其死命  
則其氣易沮必不敢大肆狂逞而吾計可行又一策也  
其或棄把漢不顧吾厚以恩義結之其部下有相繼來



諭此者惟

陛下集諸臣裁定可否得旨夷酋款塞事情兵部議處詳確以聞時巡按御史饒仁侃武尚賢等各言虜情叵測請多方撫處申嚴戰守之備疏并下部議於是兵部覆言把漢以憤激來歸心志未定其後來降人情狀難測如收牧塞上則狼子野心終非可馴之物封疆近地或

生意外之虞非完計也且俺答兵已臨境合則屯駐來降散則分攻肆掠勢所必至宜飭崇古詳加譯審別無詐譖則給之冠服以繫其心其餘相機審處宜悉如崇古議

上曰虜酋慕義來降宜加優撫其以把漢那吉為指揮使阿力哥為正千戶各賞大紅紵絲衣一襲該鎮官加意緩養候旨別用其制虜机宜令崇古等悉如原奏盡心處置務求至當

○十一月丁丑虜酋俺答聞朝廷索叛人趙全等許歸把漢那吉乃令黃台吉罷兵遣使來謝因乞封號及黃台吉官爵求輸馬與中國鐵鍋布帛互市于是總督王崇



古上疏曰俺答雄據漠北保我叛人掠彼番部其衆十餘萬矣東結朵顏三衛為嚮導西挾吉囊子孫為羽翼常首禍謀今把漢那吉激小忿而來降黃台吉謀力嚮而見挫老酋悔過投誠納款此天時也臣聞國初時嘗封虜為忠順王近事則西番諸國亦各有封請得許俺答比諸國為外藩定其歲貢之額示以賞賚之等長率衆酋以昭

聖朝一統之盛官黃台吉以結其父子祖孫之心歸我叛人剪其羽翼亦中國之利也今虜中布帛鍋釜皆仰中國每入寇則寸鐵尺布皆其所取通貢之後不可復得將不無鼠竊之憂若許通市則和好可久而華夷蕪利

他邊如遼東開原建昌肅州西番諸夷皆有市乞倣其制刻日平價申禁防奸以和其交事宜無不就者惟

上亟賜裁決以安疆場兵部覆議請俟虜衆遠遁執獻板升諸逆則遣歸把漢以結其心其封錫天典俟彼稱臣稽首然後更議

上曰虜酋既輸誠哀憐且願執叛來獻具見恭順其賞把漢那吉綵段四表裡布百疋遣之歸封貢事令總督鎮巡官詳議覆奏

○隆慶五年三月己巳

上御文華殿日講畢大學士李春芳等面奏北虜封貢事宜具言外示羈縻內修守備之意



上曰卿等既議允當其即行之于是廷臣知事由宸斷異議稍息矣

○己丑封虜酋俺答為順義王賞大紅五線紵絲蟒衣一襲綵段八表裡賜之勅曰朕惟天地以好生之德自古聖帝明王代天理物莫不上体天心下從民欲包含徧覆視華夷為一家恒欲其滋生滋育于宇内也我

太祖高皇帝膺天眷命君主萬方成祖文皇帝順天繼統鎮撫九圍薄海内外莫不臣服迨朕繼承丕緒于茲五年欽

天憲

祖愛養生靈胡越一体併包兼育頃因爾孫來歸特命邊

臣護視給其服食厚加拊納以禮遣還爾感朕恩顯稱臣内属歲歲入貢永為荒服俾獻叛賊以表悃誠遠臣為奏慷慨再三朕念此番朝貢代固有之在我國家亦惟常典爾能慕華内附請命恭虔可謂深識天道者矣朕實嘉悅特允所請封爾為順義王爾弟爾子及諸部落頭目俱授以都督等官俾爾世居本土逐草射獵各安生業同樂太平朕代

天覆憐萬國無分彼此照臨所及悉我黎元仁恩惟均無或爾遺爾尚仰遵天道堅守臣節約束爾眾永篤恭順使老者得安幼者得長保境息民世世安樂朕國家膺萬年之天運爾子孫亦保萬年之福澤豈不永有美利



我倘爾部衆或背初心擾我邊境是乃自乖大義輕棄盟言

天地鬼神實共鑒臨非爾之福爾其体悉朕意尚欽承之弭盜

○隆慶二年十月庚辰廣賊曾一本等駕船二百餘艘突至南澳窺福建玄鍾界撫按塗澤民王宗載疏請大征上命兩省督撫鎮巡官竭力夾剿務期蕩滅不得推諉以致滋蔓

○隆慶六年六月丁亥以盜劫安義縣庫奪江西布政使司左叅政方良曙俸一級黜安義縣知縣曾知經為民始定捕盜條格各州縣掌印巡捕官有盜至十人者降一級二十人者降二級三十人以上者罷官各兵備及該道官所屬盜起至五十人者降一級七十人者降二級百人以上者罷官撫按隱匿不行叅奏者聽部院科道官叅奏重治若地方有盜即報上官亟行擒滅上官即撥兵馬就便捕滅者免究仍錄叙其捕盜之功量多寡為陞賞著為令

除逆

○隆慶四年十二月丁酉虜執我叛人趙全李自馨王廷輔趙龍張彥文劉天麒馬西川呂西川呂小老等等來獻初趙全與丘富從山西妖人呂明鎮習白蓮教事覺明鎮伏誅丘富叛降虜全懼乃及弟龍王廷輔李自馨從





富降俺答駐邊外古豐州地名曰板升俺答授全等皆為首長丘富死全等益用事歲歲引虜入犯邊境苦之已而試百戶張彥文遊擊家人劉天麒明鎮子呂西川及邊民馬西川呂小老等先後降虜與全等皆居板升全等因尊俺答為帝治城郭宮殿期日升棟會大風殿棟落壓殺數人俺答懼不敢復居而全等亦各建堡治第擬于王者署其門曰開化府有蟾宮鳳閣之號俺答益貴近之隆慶初汾石之禍實全等本謀也時邊事日棘中外籍籍以板升為憂募有能得全等者拜都指揮賞銀千兩久之不能得及是以把漢那吉故虜乃誘執全等至雲石堡待命總督王崇古已得請遂受其獻遣使送歸那吉那吉戀戀不欲行崇古阮以朝廷恩意許

奉表通往不絕及宴賚甚厚那吉感恩誓不敢貳中國携其妻以歸留阿力哥及俺答使二人為質至是以狀聞兵部言全等兒悖為中國患數十年一旦駢首就縛此天心助順

聖德格遠之效也宜祭告

郊社

宗廟以昭武功

上曰叛逆元兇頻年糾虜入犯荼毒生靈罪惡滔天仰賴上穹錫佑

宗社垂麻虜首效順執縛來獻足洩神人之憤朕心嘉悅



宜奏告

郊

廟獻停正法內外有功諸臣宜加恩賚者以例聞

○隆慶五年九年庚辰哱廣西逆賊章銀豹并斬其孫

扶種于市仍傳首夷方銀豹廣西古田種民其父朝威

自弘治間與吳伯朝猛占據縣治拒殺副總兵馬俊泰

議馬鏐正德間銀豹常隨朝威攻陷洛容縣朝威誅死

銀豹乃挾其五子四出虜掠屢敗官兵隆慶元年五月


銀豹兄銀站恐為已累密送款巡撫殷正茂執銀豹以


降傳詣京師

上以付吏論銀豹謀反律與扶種俱伏誅其家屬黨類下

撫臣論治如律








國家圖書館 NATIONAL CENTRAL LIBRARY, TAIWAN, R.O.C.





國立中央圖書館, NATIONAL CENTRAL LIBRARY, TAIWAN, R.O.C.



